



16. august 2012

UKA 2012/61

Inatsisartut Suleriaasianni § 33 naapertorlugu Inatsisartuni aalajangiiffigisassatut siunnersuut imaattoq saqqummiuppara:

**Innarluutillit pisinnaatitaaffii pillugit FN-ip isumaqatigiissutaata atuutilersinneqarnissaa kiisalu isumaqatigiissutip atuutilersinneqarnera Innarluutillit pillugit Ilisimasaqarfik Siunnersuisarfillu (IPIS)-imit alapernaarsorneqassasoq pillugu Naalakkersuisut peqquneqarnissaannik Inatsisartuni aalajangiiffigisassaattut siunnersuut. Inatsisartut pineqartumi ineriartorneq pillugu ukiumoortumik nalunaarummik pissarsisinneqartassapput.**

(Inatsisartunut ilaasortaqa Karl Lyberth, Siumut)

**Tunngavilersuut:**

Innarluutillit pillugit FN-ip aalajangersagaa Danmarkimit 2009-mi Kalaallit Nunaannut tunngatillugu immikkut oqaaseqaatitaqanngitsumik akuersissutigineqarpoq, tamatumalu nassataanik taanna aamma nunatsinni atuulluni.

Maani Kalaallit Nunaanni assigiinngitsunik timimikkut tarnimikkullu innarluuteqartunik innuttaaqateqarnerput tamatta ilisimavarput.

Nunatsinni innarluutilinnik taakkulu ilaqutaannik sullissinerup amerlasuutigut pitsaanagerusinnaanera nassuerutigisariaqarparput. Innarluutillit sapinngisamik pitsaanerpaamik inuuniarnermini atugassaqartinneqarnissaat tamatta kissaatigigipput qularutiginnilluinnarpara.

Taamattaq innarluutillit sapinngisamik pitsaanerpaamik sullineqarnissaanik tamatta kissaateqarnerput, taamatullu aamma innarluutillit ikiorneqarnissamut pisariaqartitsilernermini arlaannaannulluunniit attuumassuteqanngitsumut saaffiginninnissamut periarfissaqarnissaat tamatta kissaatigigipput qularinngilara.

Tamakkulu tunngavigalugit matumuuna nunatsinni inuit innarluuteqartut pisinnaatitaaffii pillugit FN-ip aalajangersagaa sukkaasumik atuutilersinneqarnissaat pillugu sulissuteqarnissarput kiisalu pisinnaatitaaffiit atuutilersinneqarneri innarluutillit pillugit ilisimasalik katersiffimmit siunnersuisarfimmillu (IPIS-imit) nakkutigineqarnissaat pillugu siunnersuuteqarpunga.

Tamatumunnga peqatigitillugu isumaqatigiissutip atuutilersinneranut atatillugu ineriartorneq pillugu immikkoortumilu suliniutigineqartunut tunngatillugu ukiumoortumik Inatsisartunut nalunaarsiortoqartarnissaa pingaartippara.

Neriuppunga siunnersuutiga Inatsisartunit tamarmiusunit taparserneqarumaartoq.

**Allaffissornikkut kinguneqaatissat:**

Siunnersuutip kingunerisaanik IPIS-imi suliassat annikitsumik amerleriaateqassapput.

**Aningaatigut kinguneqaatissat:**

Atuutilersitsinermut atatillugu aningaasartuutit aningaasartuutissatut immikkoortinneqartut iluanni isumagineqarsinnaasutut isigineqarput.

**Inuiaqatigiinnut kinguneqaatissat:**

Siunnersuut innarluutillit ulluinnarni atugaasa pitsaanerulerlutillu oqinnerulerneranik kinguneqassaaq.